

Nipisanniarneq pillugu Namminersorlutik Oqartussat nalunaarutaat

Aalisarneq pillugu Inatsisartut inatsisaanni 31. oktober 1996-imeersumi Inatsisartut inatsisaatigut nr. 28, 28. November 2016-imeersukkut kingullermik allangortinneqartumi § 10a, § 10b, § 13, imm. 2, § 23, imm. 1, § 33, imm. 2, aamma § 34, imm. 3 naapertorlugit aalajangersarneqarpoq:

Atuuffia

§ 1. Nalunaarut tunngaviusumik killeqarfiup avataani 3 sømilimiittup sineriaallu akornanni Kalaallit Nunaata aalisarnikkut oqartussaaffigisaani nipisanniarnermut atuuppoq.

Aqutsiveqarfiit

§ 2. Nipisanniarnermi aqutsiveqarfiit ilanngussaq 1-imi aalajangersarneqarput.

Nassuiaatit

§ 3. Nalunaarummi uani imatut paasineqassaaq:

- 1) "Piffissaq aalisarfusoq" ullut aalisarfusut 60-it ataannartut.
- 2) "Usinik nuussineq" pisanik taakkuninngaluunniit tunisassianik angallammiittunik umiatsiaaqqamiittunillunniit angallammut umiatsiaaqqamulluunniit allamut nuunneqartut tamarmik, nuunneqartut usit tamarmiunersut usilluunniit ilaannarineraat apeqqutaatinagu.
- 3) "Aalisalersut nutaat" aalisartut ukiup pisassiiffusup siuliani nipisanniarsinnaanermut qinnuteqaateqarfusumut assinganik nipisanniarsinnaanermut akuersissuteqarnikuunngitsut.

Akuersissut

§ 4. Inussutissarsiutigalugu nipisanniarnermi aalisarsinnaanermut akuersissut qinnuteqartoqarnera malillugu Aalisarnermut Piniarnermullu Naalakkersuisoqarfimmit tunniunneqartartoq piumasaqaataavoq.

Imm. 2. Ukiumi pisassiiffusumi ataatsimi aqutsiveqarfinnut marlunut aalisarsinnaanermut akuersissummik qinnuteqartoqarsinnaavoq. Pineqartut tassaapput aqutsiveqarfik qinnuteqaateqartup najugaqarfia kiisalu aqutsiveqarfik sanilerisaq.

Imm. 3. Aalisarsinnaanermut akuersissutit piffissamut killiligaapput pisarisinnaasatullu akuerineqartut annertunerpaaffeqaratik.

Imm. 4. Taamaallaat angallammut qinnuteqartumit aalisarnermi atorneqartussamik pigineqartumut inuussutissarsiutigalugu nipisanniarsinnaanermut akuersiisummik tunniussisoqarsinnaavoq.

Pisassiissutit piffissarlu aalisarfusoq

§ 5. Naalakkersuisut aqutsiveqarfiit ilanngussaq 1-imi aalajangersarneqartut naapertorlugit nipisannik pisassiissutinik ukiut tamaasa aalajangiisarput.

§ 6. Piffissami 16. Juli - 1. april inuussutissarsiutigalugu arnarlunnik nipisanniarnissaq inerteqqutaavoq.
Imm. 2. Inuussutissarsiutigalugu arnarlunnik nipisanniarneq piffissap aalisarfiusup § 8, imm. 1 naapertorlugu aalajangerneqartup avataani inerteqqutaavoq.

§ 7. Inuussutissarsiutigalugu kiisalu inuussutissarsiutigiginagu angusallunnik nipisanniarneq piffissami 16. juli - 31. januar inerteqqutaavoq.

§ 8. Najukkani tunitsiviit aalisartullu kattuffisa sinniisuisa ilanngussaq 1 naapertorlugu aqutsiveqarfinni ataasiakkaani inuussutissarsiutigalugu arnarlunnik nipisanniarnermi piffissaq aalisarfissaq qaqugu aallartinneqassanersoq isumaqatigiissutigisassavaat.

Imm. 2. Imm. 1 naapertorlugu piffissat aalisarfiusussat isumaqatigiissutigineqartut nipisanniarnernerup aqutsiveqarfimmi pineqartumi aallartinnginnerani kingusinnerpaamik sapaatip akunnera sioqqullugu Aalisarnermut Piniarnermullu Naalakkersuisoqarfimmut nalunaarutigissavaat.

§ 9. Aqutsiveqarfinni ataasiakkaani piffissat aalisarfiusut pisassiissutillu pillugit nalunaarutit tusagassiutitigut aamma Naalakkersuisut nittartagaatigut nalunaarutigineqartassapput. Aamma pisassiissutit tamarmiusut nunguppata nalunaaruteqartoqassaaq.

Imm. 2. Aalisarnermut Piniarnermullu Naalakkersuisoqarfiup aqutsiveqarfimmi ataatsimi piffissap aalisarfiusup naanerata kingorna pisassiissutit pisarineqanngitsut aqutsiveqarfimmut allamut nuussinnaavai.

Usinik nuussineq

§ 10. Aalisarsinnaanermut akuersissuteqartup nammineq umiatsiaaraata aamma nammineq angallataata akornanni usinik nuussisinnaanermut akuersissut aalisarsinnaanermut akuersissuteqartup angallataa inuussutissarsiutigalugu aalisariutaappat Aalisarnermut, Piniarnermullu Naalakkersuisoqarfimmit tunniunneqassaaq. Usinik nuussisinnaanermut akuersissut aalisarsinnaanermut akuersissummi tunniunneqartumi allassimassaaq. Usinik nuussineq nalunaaruteqartussaataitaanermut ilaanngilaq.

Inuussutissarsiutigiginagu nipisanniarneq

§ 11. Nammineq atugassatut nipisanniarneq danskit naalagaaffianni innuttaassusilinnut Kalaallit Nunaanni najugaqavissunut tamanut akuerisaavoq.

Imm. 2. Nunani allani innuttaassuseqartut Danmarkimeersuunngitsut Kalaallit Nunaanni najugaqavissut aammalu ukiuni marlunni ataannartumik nalunaarutip uuma atuutinngilernerani najugaqareersut danskit naalagaaffianni innuttaassuseqartunut naligitinneqassapput.

Imm. 3. Inuussutissarsiutigiginagu nipisanniarnermut atatillugu amerlanerpaamik qassutit marluk atorineqassapput.

§ 12. Piffissap aalisarfiup arnarlunnik inuussutissarsiutigilugu nipisanniarfusutut aalajangerneqartup assingani arnarlunnik inuussutissarsiutigiginagu nipisanniartoqassaaq, tak. § 8, imm. 1.

Aalisarnermi atortut aamma qassutininik qimaannakkanik qaqitsineq

§ 13. Aalisarnek unitsinneqarpat aalisarnermi nammineq atortorisat pissutissaqanngitsumik uninngatitsinani ingerlaannaq qaqqinneqassapput.

Imm. 2. Aalisarnermi atortut qaqqinneqanngitsut piginnittoq kinaassusersineqarsinnaappat piginnittup akiligassaanik qaqqinneqassapput.

§ 14. Qassutit aalisarnerup unitsinneqarnerata kingorna ullut 7-it kingorna qaqqinneqarnikuunngitsut qassutininik uninngatitsiinnartoq kinaassusersineqarsinnaanngippat qaqqinneqarsinnaapput tigummiinnarneqarlutillu.

Pineqaatissiinerit

§ 15. § 4, stk. 1, §§ 6, 7, aamma 10, § 11, imm. 3, kiisalu §§ 12, 13 aamma 14-imik, unioqqutitsineq pinerluttulerineq pillugu inatsimmi malittarisassat malillugit akiliisitsinikkut arsaarinninnikkullu pineqaatissiinermik kinguneqarsinnaavoq.

Imm. 2. Ingerlatseqatigiiffiit (inatsisit tunngavigalugit inuttut isigineqartut) pinerluttulerineq pillugu inatsimmi malittarisassat malillugit pillaaammik imaluunniit arsaarinninnermik akiliisinneqarsinnaapput

Imm. 3. Pillaammik akiliutit Nunap Karsianut akilerneqassapput.

Atuutilersitsineq aammalu ikaarsaariarnermi malittarisassat

§ 16. Nalunaarut ulloq 1. august 2021 atuutilersinneqarpoq.

Imm. 2. Peqatigitillugu Nipisanniarneq pillugu Namminersorlutik Oqartussat nalunaarutaat nr. 2, 2. februar 2016-imeersoq atorunnaarsinneqarpoq.

§ 17. Aalisarnermut Piniarnermullu Naalakkersuisoqarfik piffissami ukiuni marlunni ulloq 1. august 2021-miit 28. februar 2023 tikillugu aalisalersunut nutaanut inuussutissarsiutigilugu nipisanniarsinnaanermut akuersissutininik tunniussissanngilaq.

Aqqaluaq B. Egede
Aalisarnermut Piniarnermullu Naalakkersuisoq

/ Jørgen Isak Olsen

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut